



**C**hristopherus ex nobili familia Venningero-  
rum in Palatinatu Rhenensi natus, & optimè  
educatus est. Is à pueris literis operam dedit, & me-  
diocrem earū usum sibi comparauit. Postea quoq̃  
militaribus studijs animum adiecit, atq̃ belli & pa-  
cis tempore clarissimus euasit. Id cum elector Pala-  
tinus cognouisset, eum inter consiliarios admisit, et  
ob magnum rerum usum suo nomine uarias domi-  
atq̃ foris res administrare iussit. Cum autem Caro-  
lus Cæsar 1545 cum Protestantibus per Granuellanum  
& Nauium seriò de Concilio & bello Turci-  
co ageret, Protestantes hunc Christopherum ordi-  
narunt, ut illis responderet, et amicè cum ijs (quoad  
fieri posset) transigeret. Pari ratione quoq̃ eodē anno, cum Gallus & Anglus  
grauissimum bellum cœpissent, Protestantes hunc Christopherum ad regem  
Galliæ legatum miserunt, ut suo nomine intercederet, & pacis consilia suade-  
ret. Id quod ille magna dexteritate perfecit, atq̃ ob multas animi & corporis  
uirtutes sibi magnam apud principes authoritatem cōparauit. præsertim cum  
is pietatem amaret, & suo exemplo reliquos nobiles ad uirtutes excitaret. A-  
nonim.